



**Angajoqqaat meeqqaminnik arsaagaasimasut angusassamik toraagaqarluni suliniarfigineqarnissaannut siunnersuusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Angusassamik toraagaqarluni suliniarnermi siunertarineqassaaq 2014-imi upernaanerani ataatsimiinnissami, angajoqqaat meeqqaminnik arsaagaasimasut angajoqqaatut isumassuisinnaanikkullu nukittorsarneqarnissaat, taamaasillutik meeqqat angajoqqaaminnut angerlaqqissinnaaqqullugit.**

(Jens B. Frederiksen, Demokratit)

Jens B. Frederiksen-ip Demokratineersup siunnersuutigaa angajoqqaat meeqqaminnik arsaagaasimasut angusassamik toraagaqarluni suliniarfigineqarnissaannut Naalakkersuisut siunnersuusioqquneqarnissaat.

Demokratillu tunngavilersuutiminni taavaat meeqqanik inuusuttunillu angerlarsimaffiup avataanut inissiisarneq 1994-miit 2006-mut 6 procentimut qaffassimasoq.

Inuit Ataqatigiit isumaqarpugut meeraq ataaserluunniit angerlarsimaffiup avataanut inissinneqartariaqarpat tamanna ajuusaarnartuusoq pinngitsoorniagassaq. Taamaammat Inuit Ataqatigiit ukiuni kingullerni siusissukkut iliuuseqarneq pingaartillugu assut sulisimapput. Eqqaaginnartigu Naalakkersuisooqatigiinnitsinni meeqqanut inuusuttunullu periusissiaq pilersikkatsigu. Tassanilu aallaaviunerpaavoq ilaqutariit ajornartorsiortut siusissukkut paasineqarlutillu ikiorserneqartarnissaat. Ajornartorsiutip allivallaannginnerani iliuuseqarnikkut meeraq angajoqqaavinit avissaartinneqannginnissaa anguniarneqartuartassamat.

Meeqqanilli inuusuttunilluunniit angerlarsimaffiup avataanut inissiisoqartariaqalersillugu inatsisini allaqqavoq pilersaarusiortoqassasoq. Meeqqap angerlarsimaffiup avataanut inissinnissaanut suliniuteqareernerme malinnaaneq aallartinniaaraanni, iliuusissatut pilersaarummik suliaqartoqassaaq. Tassani meeqqap inuusuttulluunniit atugai aamma suliniuteqareernerme

malinnaanermik ingerlatsiffigineqassasoq nassuiarneqarsimassapput.

Meeqqap angerlarsimaffiup avataanut inissinneqarnissaa iliuusissatut pilersaarummi ilaatinneqarpat, meeraq (aamma angajoqqaat) inuttut siunnersuisoqarnissamut pisinnaatitaaffeqarput.

Inuit Ataqtigiit isornarluinnartutut isigaat kommunit pisussaaffimmittut pilersaarusiortarsimanginnerat. Taamaammat ilaqtariinnermut inatsisilerinermullu Naalakkersuisoq Martha Lund Olsen Ilaqtariinnermut Peqqinnissamullu ataatsimiitsitaliami oqaloqatigiumaneqarpoq, tassanilu piumaffigineqarluni kommunit pilersaarusiortannginnerat iliuuseqarfigeqqullugu. Inuit Ataqtigiinnilu suliap tamatuma ingerlanera malinnaavigissavarput. Inuit Ataqtigiit meeqqat inuusuttullu angerlarsimaffiup avataanut inissinneqarneranni pilersaarusiortarnissaq pingaartutut isigaat aammalu angajoqqaanut meeqqap uternissaanut siunertaqartumik iliuuseqarnissaq pingaartillugu.

Taamaammat Demokratineersup Jens B. Frederiksen-ip siunnersuutaa angajoqqaat meeqqaminnik arsaagaasimasut angusassamik toraagaqarluni suliniarfigineqarnissaannut Naalakkersuisut siunnersuusioqquneqarnissaat Inuit Ataqtigiit Ilaqtariinnermut Peqqissutsimullu ataatsimiitsitaliamut ingerlateqqikkumavarput.